



**Partisipasaun iha Konferénsia
Internasionál kona-ba Peskiza no
Inovasaun ba EU Global Gateway:
Esperiénsia no Rezultadu husi Nasaun
Afrikanu, Karibeanu no Pasífiku (ACP),
inklui Timor-Leste**

Husi:

DR. JOSÉ CORNÉLIO GUTERRES
Prezidente Konsellu Ezekutivu INCT

Díli, May 22, 2026

RELATÓRIU MISAUN :

Partisipasaun iha Konferénsia Internasionál kona-ba Peskiza no Inovasaun ba EU Global Gateway: Esperiência no Rezultadu husi Nasaun Afrikanu, Karibeanu no Pasífiku (ACP), inklui Timor-Leste

Fatin	: Bruxelas, Béljika
Períodu	: 20–21 Maiu 2026
Enkontru kona-ba ISSN	: Paris, Fransa
Períodu	: 22 Maiu 2026
Partisipante	: Dr. José Cornélio Guterres
Instituisaun	: Institutu Nasional Siénsia no Teknolojia Timor-Leste (INCT-TL)

1. Introdusaun

Relatóriu ida-ne'e apresenta rezultadu husi misaun ofisiál ne'ebé hala'o iha Bruxelas, Béljika, no Paris, Fransa, entre loron 20 to'o 22 Maiu 2026. Misaun ida-ne'e iha objetivu prinsipál rua. Primeiru, partisipa iha Konferénsia Internasionál ho tema "*Research and Innovation for the EU Global Gateway: Experiences and Results from African, Caribbean and Pacific (ACP) Countries*" ne'ebé realiza iha Bruxelas iha loron 20–21 Maiu 2026. Segundu, hala'o enkontru institusionál ho Sentru Internasionál ISSN iha Paris kona-ba estabelesimentu Sentru Nasional ISSN iha Timor-Leste ne'ebé sei administra husi Institutu Nasional Siénsia no Teknolojia (INCT).

Konferénsia ne'e hamutuk representante sira husi nasaun ACP, Uniaun Europeia (EU), Organizasaun Estadu Afrikanu, Karibeanu no Pasífiku (OACPS), instituisaun peskiza, formuladór polítika públika no parseiru dezvoltamentu sira atu fahe esperiência, boa prátika no lisaun aprendidu sira husi implementasaun servisu Policy Support Facility (PSF) no reforma iha área peskiza no inovasaun.

2. Loron Dahuluk, 20 de Maiu 2026 – Atividade Konferénsia.

2.1 Apresentasaun Nasaun: Esperiência Servisu PSF iha Timor-Leste

Iha sesaun apresentasaun nasaun, ha'u representa INCT no Timor-Leste hodi apresenta rezultadu no esperiência implementasaun servisu Policy Support Facility (PSF) iha Timor-Leste.

Apresentasaun ne'e hatudu katak INCT, ne'ebé estabelese iha tinan 2014, implementa ona liu husi projetu peskiza no iniciativa estratéjika 80 projetu peskizaatu hodi promove siénsia, teknolojia no inovasaun (STI) iha Timor-Leste. Maski nune'e, sei iha dezafiu importante balun, hanesan

ekosistema investigasaun nasional ne'ebé seidak forte, númeru peskizadór kualifikadu ne'ebé sei limitadu no balansu, koordenaasaun ne'ebé seidak lao di'ak entre instituisaun ensinu superior no peskiza, mekanizmu disseminasaun no prezervasaun koñesimentu siéntífiku ne'ebé sei limitadu, no falta estudu kompreensivu ne'ebé reflète realidade sosio-kultural no siéntífika Timor-Leste atu apoia dezvoltimentu polítika bazeia ba evidénsia.



Figura 1: Sesaun Aprezentasaun

Atu responde ba dezafiu hirak ne'e, iha tinan 2021 INCT husu apoiu husi OACPS atu desenvolve kadru polítika nasional STI, no Repositóriu Dijital Nasional ba Timor-Leste. Nune'e, iha tinan 2022 OACPS liu husi Programa PSF ne'ebé finansia husi Uniaun Europeia. Tuirmai, iha tinan 2024-2025 implementa tan servisu PSF faze tuir mai ne'ebé produz rekomendasaun polítika adisionál atu fortalece sistema STI nasional.

Husi prosesu ne'e, identifika ona lisaun importante balun. INCT presiza autonomia jurídika no finanseira ne'ebé forte liután atu koordena polítika STI nasional ho efetivu. Rekomendasaun polítika tenke transforma ba regulamentu no lei ne'ebé bele implementa. Investimentu iha rekursu umanu no aprendizajen durante moris tomak importante ba dezvoltimentu institusionál. Estabelesimentu Repositóriu Dijital Nasional sai instrumentu importante atu dokumenta, rai no dissemina produktu siéntífiku nasional. Aleinde ne'e, kooperasaun internasionál no rejionál, liuliu ho ASEAN no CPLP, importante tebes ba dezvoltimentu STI. Polítika STI mos tenke inovativu, sustentavel no alinha ho Objektivu Dezvoltimentu Sustentável (SDGs) no Planu Estratéjiku Dezvoltimentu Nasional Timor-Leste.

Servisu PSF lori rezultadu importante balun. Iha área polítika no governasaun, servisu ne'e apoia implementasaun Planu Estratéjiku 2022–2030, identifika área peskiza prioritária nasional lima no apoia revizaun lei orgánika institusionál atu fortalece governasaun STI. Iha área infraestrutura peskiza, estabelese Repositóriu Dijital Nasional liuhusi kooperasaun ho BRIN Indonézia no fortalece publikasaun siéntífika liuhusi revista siéntífika no sítiu eletróniku INCT. Iha área rekursu umanu, realiza formasaun kona-ba metodolojia peskiza, hakerek siéntífiku, dezvoltimentu projetu, étika peskiza, monitorizasaun no avaliasaun. Iha área inovasaun, dezvoltolve Mapa Estratéjiku no Siéntífiku atu orienta alokasaun fundu bazeia ba evidénsia, promove modelu Quadruple Helix no mobiliza apoiu finanseiru no kontribuisaun iha forma seluk ho valor liu USD 242.500.

Maski nune'e, dezafiu importante ida mak dependénsia ne'ebé aas ba fundu esternu no Fundu Petrolíferu atu sustenta atividade STI iha país. Relatóriu Rekomendasun Polítika PSF 2025 ajuda INCT atu klarifika di'ak liután kuadru dezvoltimentu polítika STI iha Timor-Leste. Estudu ne'e mos motiva INCT atu submete proposta ba Fundu IBSA-UNESCO atu apoia implementasaun polítika STI iha futuru. Prioridade sira ba futuru inklui fortalese sistema avaliasaun no akreditasaun sentru peskiza, estabelese Sentru Nasional ISSN, promove publikasaun siéntífika ho asesu livre no habelar kooperasaun iha rede peskiza ASEAN no CPLP.

2.2 Sesaun Diskusaun Grupu

Partisipante sira fahe ba grupu tolu. Ha'u partisipa iha grupu ne'ebé foka ba área polítika publikania, hamutuk ho membru sira inklui Christine (Rapporteur), Julius (Moderador), Simon, Christelle, Jose Cornelio Guterres, Aliouve, Malcolm, Sala no Alessandro Bello.



Figura 2: Sesaun diskusaun

Partisipante sira konkorda katak integrasaun polítika ne'ebé susesu presiza envolvimentu iha siklu tomak formulasaun polítika nian, inklui identifikasaun problema, produsaun evidénsia, konsultasaun ho parte interesada sira, formulasaun polítika, implementasaun, monitorizasaun no avaliasaun. Polítika tenke alinha ho prioridade nasional, planu dezvoltimentu no prosesu orsamentu, ho envolvimentu ativu husi governu, akademia, setor privadu no sociedade sivil.

Diskusaun mos enfatiza katak rekomendasaun polítika tenke bazeia ba evidénsia, prátiiku, bele implementa no realistiku husi perspetiva finansiera. Rekomendasaun sira tenke hatudu benefísiu sosioekonomiku ne'ebé mensurável, hanesan kriasaun empregu, adosaun inovasaun, transferénsia teknolojia no dezvoltimentu sustentavel.

Iha área governasaun no reforma institusionál, partisipante sira salienta importánsia governasaun inkluziva, transparénsia, prestasaun kontas, partisipasaun grupu vulneravel, kooperasaun rejionál no mekanizmu ko-kriasaun entre parte interesada. Nune'e mos, identifika obstákulu balun hanesan fragmentasaun sistema governasaun, koordenasaun interministeriál ne'ebé fraku, instituisaun sira servisu mes-mesak, kolaborasaun limitadu, insentivu insuficiente, planeamentu estratéjiku ne'ebé la forte, limitasaun orsamentu no utilizasaun limitadu ba think tanks no instituisaun konselleiru.

Atu responde ba dezafiu hirak ne'e, partisipante sira identifika oportunidade hanesan fortalese parseiria rejionál no internasionál, aumenta partisipasaun universidade no instituisaun peskiza, melhora asesu ba finansiamentu no teknolojia, promove ekonomia sirkulár no transformasaun rezidu ba valor ekonomiku, no aumenta kolaborasaun peskiza no inovasaun.

Iha diskusaun ne'e, ha'u mos fahe rekomendasaun PSF Timor-Leste atu aumenta investimentu ba Peskiza no Dezvoltimentu (R&D) to'o 0,25% husi PIB no fortalese papel koordenasaun INCT iha kuadru Quadruple Helix.

2.3 Sesaun Lokraik: Rekomendasaun ba Implementasaun Polítika

Partisipante sira dezvoltolve rekomendasaun importante balun atu garante implementasaun polítika ne'ebé efetivu. Rekomendasaun sira inklui promove parseiria EU-ACP ne'ebé fó benefísiu ba parte hotu liu husi iniciativa Global Gateway; haforsa sistema dadus no tomada desizaun bazeia ba evidénsia; apoia transferénsia teknolojia, inovasaun, empreendedorismu no jestaun propriedade intelektuál; melhora kuadru regulatóriu relasiona ho étika peskiza, inteligénsia artifisiál, rekursu jenétiku no integrasaun rejionál; promove programa peskiza orienta ba misaun no preparasaun ba epidemia; dezvoltolve bioekonomia sustentavel no inovasaun ambiental; aumenta utilizasaun GIS, observasaun terrestre, remote sensing no sistema komunikasaun satélite; fortalece instituisaun peskiza no inovasaun liuhusi kolaborasaun siéntífika no troka koñesimentu; no aumenta investimentu ba peskiza no inovasaun to'o pelumenu 1% husi PIB.

3. Loron Daruak, 21 de Maiu 2026– Apresentasaun istoria susesu iha Inovasaun no Diskusaun Painél.

Loron daruak foka ba apresentasaun istoria susesu iha ekosistema peskiza no inovasaun husi nasaun ACP sira, tuir mai ho diskusaun paenel ho temátiku tolu.

Ha'u partisipa nu'udar painelista ida iha sesaun kona-ba polítika STI no reforma institusionál. Iha pergunta dahuluk kona-ba prioridade reforma sira, ha'u salienta katak esperiénsia Timor-Leste hatudu reforma fundasionál tenke implementa uluk molok mekanizmu inovasaun avansadu sira. Elementu fundamentál sira inklui estabesimentu INCT nu'udar instituisaun koordinadora nasional, dezvoltimentu estrutura governasaun STI, kriaun Repositóriu Dijitál Nasional, adosaun polítika STI liuhusi modelu Quadruple Helix no investimentu iha bolseiru, formasaun no dezvoltimentu rekursu umanu.



Figura 3: *Meeting dinner* ho kolega sira husi África Cariben no Pasífiku

Ha'u mos esplika katak reforma balun ne'ebé promove husi parseiru esternu, hanesan eskritóriu transferénsia teknolojia no mekanizmu komersializasaun avañada, seidak fô impaktu boot tanba baze industriál no demanda inovasaun iha Timor-Leste seidak forte. Lisaun importante mak fortalese instituisaun, governasaun no rekursu umanu tenke sai prioridade molok implementa sistema inovasaun ne'ebé kompleksu.

Iha pergunta daruak kona-ba peskiza no inovasaun nu'udar “infraestrutura mole”, ha'u esplika katak INCT promove peskiza no inovasaun nu'udar instrumentu estratéjiku atu melhora qualidade investimentu públiku no hamenus risku implementasaun. Ezemplu importante mak estabesimentu Repositóriu Dijitál Nasional, rekomendasaun atu aloka 0,25% husi PIB ba R&D no kontribuisaun peskiza atu responde ba inundasaun, jestaun lixu, planeamentu urbana, agrikultura, irigasaun no dezvoltimentu cadeia valor kafé. Ha'u mos refere esperiénsia husi

nasaun hanesan Korea do Sul no Singapura ne'ebé hatudu papel transformativu siénsia, teknolojia no inovasaun iha dezvoltamentu nasional. Mensajen prinsipal mak peskiza no inovasaun tenke konsidera nu'udar infraestruturá esensial atu apoia seguransa ai-han, reziliénsia klimatika, prevensaun desastres, governasaun dijital, emregu ba juventude no dezvoltamentu sustentavel.

4. Loron Datoluk 22 De Maiu 2026 – Enkontru Institusionál ho Sentru Internasionál ISSN iha Paris;

Hafoin konferensia loron rua iha Brusselas termina iha iha dia 22 de Maiu 2026, ha'u Aranka ba Paris, Fransa, atu hasoru malu ho Dra. Gaëlle Béquet, Diretora Sentru Internasionál ISSN.

Objetivu prinsipal enkontru ne'e mak finaliza preparasaun ba estabelesimentu Sentru Nasional ISSN iha Timor-Leste ne'ebé sei administra husi INCT. Durante enkontru, parte rua konkorda kona-ba finalizasaun akordu estabelesimentu Sentru Nasional ISSN, nesesidade rekursu umanu no programa formasaun ba funsionáriu INCT ne'ebé sei jere sentru ne'e, partisipasaun Timor-Leste iha konferénsia internasionál ISSN iha Méxiku iha Outubru 2026 no Kuba iha 2027, prosedimentu membru no obrigasaun finanseira, no mekanizmu relatóriu anuál entre INCT no Sentru Internasionál ISSN.



Figura 4: Enkontru ho diretora geral Sentru ISSN iha Paris

Depois akordu ne'e asina, Timor-Leste sei sai nasaun membru ba-97 iha Rede Internasionál ISSN, ne'ebé representa susesu boot ida ba sistema publikasaun siéntífika no jestaun informasaun siéntífika iha país.

5. Konkluzau

Misaun ida-ne'e iha Bruxelas no Paris fó oportunidade importante atu troka esperiénsia ho parseiru internasionál sira, apresenta progresu Timor-Leste iha implementasaun programa PSF no fortalece kooperasaun iha área peskiza no inovasaun. Konferénsia ne'e reafirma importánsia formulasaun polítika bazeia ba evidénsia, fortalese instituisaun, dezenvolve rekursu umanu no garante mekanizmu finansiamentu sustentavel ba peskiza no inovasaun.

Esperiénsia Timor-Leste hatudu katak estabelesimentu instituisaun forte, dezenvolvimentu kapasidade peskiza nasional no kolaborasaun entre governu, akademia, indústria no sociedade sivil sai kondisaun fundamentál ba dezenvolvimentu inovasaun sustentavel. Aleinde ne'e, misaun ne'e mos produz progresu importante ba estabelesimentu Sentru Nasional ISSN iha Timor-Leste, ne'ebé sei kontribui ba fortalese publikasaun siéntifika, jestaun koñesimentu no visibilidade internasionál ba rezultadu peskiza Timor-Leste.

Prepara husi:


Dr. José Cornélio Guterres

Prezidente Konsellu Ezekutivu

Institutu Nasional Siénsia no Teknolojia Timor-Leste (INCT-TL)